

A LA CONSEYERA DE LA PRESIDENCIA DEL PRINCIPÁU D'ASTURIES

D./D^a. (...), con DNI número (...), no so condición de Presidente del Aconceyamientu de Xuristes pol Asturianu (AXA), asitiáu a efeutos de notificaciones nel séptimu pisu, del número 22, cai Pérez de la Sala, d'Uviéu, preséntase y DIZ:

1.- L'Asociación que presido ñació cola finalidá de contribuyir al desaniciu de les torgues que se-y ponen davezu al emplegu de la llingua asturiana n'actividá profesional de los xuristes y, siendo asina, que la Conseyería de la que vusté ye cabezalera, vien espublizando los pliegos de cláusules alministratives polos que se rixen los concursos de contratación, conteniendo los modelos impuestos polos artículos 79.1 del Real Decretu Llexisllativu 2/2000, de 16 de xunu, pol que s'aprueba el testu refundíu de la Llei de Contratos de les Alministraciones Públiques, y 80 del so Reglamentu, escritos namás en castellán, torgando asina a los ciudadanos, pente ellos los miembros de l'asociación que represento, la posibilidá d'exercitar un drechu que-yos reconoz l'artículo 4 de la Llei 1/98, de 23 de marzu, d'usu y promoción del bable/asturianu, en relación col artículo 36.2 de la Llei 30/92, de 26 de payares, de Réxime Xurídicu de les Alministraciones Públiques y del Procedimientu Alministrativu Común y los artículos 4 y 10.1.21 del Estatutu d'Autonomía d'Asturies.

2.- La cuestión ye nidia, porque nidia ye la redaición imperativa del mentáu artículo 79.1 de la Llei de Contratos de les Alministraciones Públiques ("...las proposiciones... se ajustarán al modelo que se establezca en el pliego de cláusulas administrativas particulares..."); grave, porque lleva al ciudadán a la necesidá de tener que dirixise a l'Alministración en castellán -quíralo o non- si quier concursar; y manifestamente inxusta, porque tolos alministraos tienen el drechu, reconocíu nel artículo 4 de la Llei 1/98, a dirixise n'asturianu a esa Conseyería.

Tan ye asina que toles otres Conseyerías asoleyen los modelos conteníos nos pliegos de cláusules alministratives nes dos llingües.

3.- D'otra miente, nun abulta que comportamientu talu seya la forma afayadiza de cumplir llealmente colos compromisos (pacta sunt servanda) del Plan pa la Normalización Social del Asturianu.

Poru,

ENCAMIENTO-Y: Que dea les órdenes afayadices pa que nos venideros pliegos de cláusules alministratives s'inxera, xunto colos castellanos, otros modelos de proposición redautaos en llingua asturiana, col envís de que l'alministráu pueda escoyer los que más-y presten y exercitar asina'l drechu que tien reconocíu a dirixise a l'Alministración nuna u otra llingua.

Ye xusto.

N'Uviéu, a (...)